



REPUBLIKA E SHQIPËRISË  
KUVENDI  
KOMISIONI PARLAMENTAR PËR ÇËSHTJET LIGJORE, ADMINISTRATËN  
PUBLIKE DHE TË DREJTAT E NJERIUT

Nr. 662/1 Prot.,

Tiranë, më 24.02.2017

Lënda:

Kthim përgjigje për shkresat nr. Prot 31, datë 17.02.2017 dhe nr. Prot. 36, datë 20.2.2017

Drejtuar:

Avokat i Popullit  
Igli Totozani

I nderuar z. Totozani,

Në përgjigje të shkresave tuaja nr. Prot 31, datë 17.02.2017 dhe nr. Prot. 36, datë 20.2.2017, drejtuar Kryetarit të Komisionit për Çështjet ligjore, Administratën Publike dhe të Drejtat e Njeriut, në Kuvendin e Republikës së Shqipërisë, më lejoni t'ju sjell në vëmendje sa më poshtë:

*1. Lidhur me përcaktimin e emrit të anëtarit të Këshillit të Emërimeve në Drejtësi, që do të marrë atributet e Kryetarit të këtij Këshilli, për efekt të Komisionit Ad Hoc për përzgjedhjen e kandidatëve avokatë për KLGJ dhe KLP:*

Në datën 27.01.2017, Kryetari i Kuvendit, organizoi shortin për përzgjedhjen e anëtarëve të Këshillit të Përkohshëm të Emërimeve në Drejtësi. Me të njëjtin short u përzgjedhën edhe anëtarët zëvendësuesve për secilin institucion, ndër të cilët edhe anëtari zëvendësues nga Gjykata e Lartë, në përputhje me pikën 7 të nenit 221 të ligjit nr. 115/2016 "Për organet e qeverisjes së sistemit të drejtësisë".

Nga procedura e shortit rezultoi e përzgjedhur si Kryetare e Këshillit të Përkohshëm znj. Mirela Fana, njëkohësisht anëtare e Gjykatës së Lartë. Bazuar në ligjin nr.84/2016 "Për rivlerësimin kalimtar të gjyqtarëve dhe prokurorëve në RSH", si një "lex specialis", subjekti i rivlerësimit ka të drejtën të japë dorëheqjen jo më vonë se 3 muaj nga hyrja në fuqi e ligjit, pra jo më vonë se data 01.04.2017. Sipas këtij ligji, dorëheqja i paraqitet Presidentit të Republikës së Shqipërisë. Duke mbajtur në konsideratë dorëheqjen e znj. Fana si anëtare e Gjykatës së Lartë, si dhe njoftimin në faqen zyrtare të Presidentit, sipas të cilit dorëheqja e



znj. Fana është depozituar pranë këtij institucioni në datë 31.1.2017, në zbatim të parashikimeve ligjore të ligjit nr. 84/2016, mandati i saj si anëtare e Gjykatës së Lartë ka përfunduar. Rrjedhimisht edhe mandati si Kryetare e Këshillit të Përkohshëm të Emërimeve në Drejtësi ka përfunduar.

Referuar parashikimeve ligjore të ligjit nr. 115/2016 "Për organet e qeverisjes të sistemit të drejtësisë", konkretisht neni 23 "Përbërja e Komisionit të Pavarur *Ad Hoc* për verifikimin dhe vlerësimin paraprak të kandidatëve" parashikon se:

1. Komisioni i Pavarur *Ad Hoc* për verifikimin dhe vlerësimin paraprak të kandidatëve për anëtarë të Këshillit të Lartë Gjyqësor përbëhet nga:

a) Avokati i Popullit;

b) Kryetari i Këshillit të Emërimeve në Drejtësi;...

2. Avokati i Popullit është Kryetari i Komisionit të Pavarur *Ad Hoc*. Kryetari i Këshillit të Emërimeve në Drejtësi është zëvendëskryetar i komisionit.

Të njëjtat rregulla janë parashikuar edhe në nenin 121 për përbërjen e komisionit *Ad Hoc*, për përzgjedhjen e anëtarëve të Këshillit të Lartë të Prokurorisë nga avokatia.

Sa më sipër gjykojmë se Kryetarja e dorëhequr e Këshillit të Përkohshëm të Emërimeve në Drejtësi, zëvendësohet nga anëtari zëvendësues për shkak të ligjit, i përzgjedhur me short nga i njëjti institucion.

2. Lidhur me kërkesën për trajtimin financiar të Komisionit të pavarur *Ad Hoc* që do të vlerësojë paraprakisht kandidatët nga radhët e avokatëve për anëtarë të Këshillit të Lartë Gjyqësor dhe Këshillit të Lartë të Prokurorisë, sqarojmë se:

Ligji nr. 115/2016 "Për organet e qeverisjes së sistemit të drejtësisë" ka parashikuar ngritjen funksionimin dhe kompetencat e Komisioneve të Pavarura *Ad Hoc* si komisione me karakter të përkohshëm për verifikimin dhe vlerësimin paraprak të kandidatëve për anëtarë të KLGJ dhe KLP nga radhët e avokatëve. Bazuar në nenet 24 dhe 122 të ligjit nr. 115/2016, Komisioni i Pavarur *Ad Hoc* është organ i pavarur që bën verifikimin paraprak të kushteve ligjore, vlerësimin paraprak të kritereve profesionale e morale dhe renditjen e avokatëve që kandidojnë për të qenë anëtarë të Këshillit të Lartë Gjyqësor dhe Këshillit të Lartë të Prokurorisë.

Ligji i sipërcituar nr. 115/2016, në nenin 27 pika 4 të tij dhe 125 pika 4 parashikon që: "Avokati i Popullit siguron mbështetjen e nevojshme organizative, administrative dhe financiare për realizimin e funksionit dhe të detyrave të Komisionit *Ad Hoc*".

Në vijim të parashikimeve ligjore të sipërcituara sqarojmë se ligji nr. 115/2016 ka parashikuar që mbështetja e nevojshme organizative, administrative dhe financiare për realizimin e detyrave dhe funksionimit të Komisionit të Pavarur *Ad Hoc* sigurohet nga Avokati i Popullit. Në cilësinë e institucionit të pavarur kushtetues Avokati i Popullit, menaxhon vetë buxhetin e miratuar nga Kuvendi i Shqipërisë, në përputhje me parashikimet dhe kërkesat e legjislacionit në fuqi për menaxhimin buxhetor dhe menaxhimin financiar.

Sjellim në vëmendjen tuaj se çështja e kompetencave në përcaktimin e pagave dhe shpërblimeve të punës në Republikën e Shqipërisë, është e rregulluar nga ligji nr. 10405/2011 "Për kompetencat për caktimin e pagave dhe shpërblimeve". Ky ligj në nenin 4 të tij përcakton se Këshilli i Ministrave, sipas rastit, me propozimin e Ministrisë të Financave,



miraton shpërblimin e anëtarëve të këshillave, të bordeve ose të komisioneve të institucioneve qendrore, kur legjislacioni përkatës parashikon krijimin e një këshilli ose të bordit drejtues me të drejtë pagese në këto institucione. Për sa më lart, në rast se nga ana juaj si institucioni që mbështet shpenzimet administrative dhe financiare për funksionimin e komisionit *Ad Hoc*, vlerësohet e arsyeshme, atëherë mund të paraqisni propozimin përkatës për ndërmarrjen e nismës pranë ministrive përgjegjëse të linjës.

Sa më sipër, shpresojmë të kemi kontribuar sadopak në interpretimin dhe zbatimin e drejtë të ligjit nga institucioni juaj.

Duke ju falenderuar për mirëkuptimin,

Me respekt

**Fatmir XHAFAJ**

**KRYETAR**